

KEUNGGULAN FALSAFAH PERTANIAN ISLAM PENYUMBANG KELESTARIAN ALAM SEKITAR

ISMAIL BIN OMAR
ismailomar@kuis.edu.my

DR. ZAINUDDIN BIN CHE SEMAN

Fakulti Syariah dan Undang-undang
Kolej Universiti Islam Antarabangsa Selangor

ABSTRAK

Alam sekitar adalah kurniaan dan amanah Allah kepada manusia selaku KhalifahNya. Pertanian pula merupakan salah satu dari perintah dan strategi untuk memelihara alam sekitar sehingga ke tempoh yang ditentukanNya. Oleh itu kertas ini cuba menyingkap konsep falsafah pertanian dalam Syariah Islam yang sebegitu unggul dan menyumbang ke arah kelestarian alam sekitar. Secara khususnya perkara-perkara yang berkaitan dengannya akan diuraikan iaitu: penjagaan dan pembangunan alam sekitar sebagai amanah Tuhan, falsafah pertanian dalam Islam, hukum dan dalil melaksanakan pertanian, asas-asas pertanian menurut Al Quran, faedah pertanian terhadap manusia dan alam. asas tanah pertanian mengikut Rasulullah saw., amanah tanah dan amanah petani, galakan bercucuk tanam serta ilmu-ilmu yang diperlukan dan bab-bab fiqh yang berkaitan dengan pertanian. Kajian ini telah menggunakan Kaedah Deduktif, kaedah Perpustakaan dan Kaedah Dukumentasi, bagi mendapat maklumat yang berkaitan.

Kata Kunci: falsafah, pertanian Islam, kelestarian, alam sekitar

1. Pendahuluan

Terdapat empat perkara teras yang sentiasa menjadi pokok perbahasan falsafah perbandingan antara agama atau ideologi utama dalam kerangka pemikiran manusia pada masa kini iaitu konsep: tuhan, alam, manusia dan kehidupan. Setiap agama dan ideologi umumnya mempunyai asas akidah atau persepsi tersendiri dalam perkara-perkara ini. Maka dari akidah atau persepsi inilah bertitik tolaknya kebanyakan agenda dan aktiviti insan di atas muka bumi ini. Setiap satunya akan digarabkan falsafahnya secara bersepadu kecuali di dalam pemikiran athies dan sikular yang mengeneipkan konsep tuhan dan kehidupan di akhirat. Dari kedua-dua pemikiran inilah ramai dari kalangan manusia sama ada menjadi rakus atau dayus dalam mencatur kehidupan di alam semesta ini. Lantaran itu terbinalah tamadun rapuh yang lebih membawa padah berbanding rahmah, atau *istidijraj* untuk orang-orang yang zalim. Akhirnya kesejahteraan pincang yang membawa *fasad* terbentuk di sana sini. *Fasad* yang terpancang bukan hanya kepada diri dan tingkah laku mereka sahaja, tetapi juga kepada alam sekitar. Oleh itu alam dan isinya sering berhadapan dengan gejala yang mengancam kelestarian dan keharmonian. Hutan yang dikaut hasilnya tidak berganti. Bukit bukau yang digondolkan terbiar tanpa pembangunan mesra alam yang menyusuli. Lebih malang lagi jika ia berlaku secara tidak *syar'ie* atau *illegal* sebagaimana yang sering kita lihat pada hari ini.

2. Alam Sekitar Kurniaan Tuhan.

Sejak awal kejadian lagi manusia adalah khalifah Allah, dengan maksud: makhluk Allah yang menggantikan makhlukNya yang terdahulu di bumi ini. Atas *platform* ini manusia diamanahkan untuk mengurus diri dan masyarakat mereka serta alam sekitar sebagai ujian dariNya. Maka dikurniakanNya kepada manusia ini alam sekitar dengan segala khazanah dan keajaibannya sebagai kemudahan untuk menjalani kehidupan di bumi ini dengan membawa wadah suci iaitu *khilafah* dan *ubudiyah* agar mereka ikhlas menyembahNya dengan penuh syukur. Firman Allah;

أَلَمْ تَرَوْا أَنَّ إِلَهَ سَخَّرَ لَكُمْ مَّا فِي السَّمَوَاتِ وَمَا فِي الْأَرْضِ وَأَسْبَغَ عَلَيْكُمْ نِعْمَهُ
ظَهْرَةً وَبَاطِنَةً.....(الآية: لقمان: ٢٠)

Maksudnya;

Tidakkah kamu lihat bahawa Allah telah mempermudah bagi kamu apa yang berada di langit dan apa yang berada di bumi, dan Dialah yang melipatgandakan ke atas kamu nikmat-nikmatnya dalam kedaan zahir dan batin... (Luqman: 20)

Firman Allah lagi;

ذلكم الله ربكم لا إله إلا هو خالق كل شيء فاعبدوه....(الآية: الأنعام: ١٠٢)

Maksudnya;

Dialah Allah tuhan kamu. Tiada tuhan yang layak disembah melainkan Dia jua, selaku Pencipta tiap-tiap sesuatu, maka sembahlah Dia. (Al An'am: 102)

Firman Allah lagi;

الله الذي خلق السموات والأرض، وأنزل من السماء ماء فأخرج به من الثمرات رزقا لكم، وسخر لكم الفلك لتجري في البحر بأمره وسخر لكم الأنهار، وسخر لكم الشمس والقمر دائيين وسخر لكم الليل والنهار وآتاكم من كل ما سألتموه، وإن تعدوا نعمة الله لا تحصوها، إن الإنسان لظلوم كفار.(إبراهيم: ٣٢-٣٤)

Maksudnya:

Allah jualah yang menciptakan langit dan bumi dan menurunkan hujan dari langit lalu mengeluarkan dengan air hujan itu buah-buahan untuk menjadi makanan bagi kamu dan Dia yang memberi kemudahan kepada kamu menggunakan kapal-kapal untuk belayar di laut dengan perintahNya, juga yang memudahkan sungai-sungai untuk kamu (mengambil manfaat darinya). Dan Dia juga yang menjadikan matahari dan bulan sentiasa beredar, untuk kepentingan kemudahan kamu dan yang menjadikan malam dan siang bagi faedah hidup kamu. Dan Dia telah memberi kepada kamu sebahagian dari tiap-tiap apa jua yang kamu hajati dan jika kamu menghitung nikmat Allah nescaya lemahlah kamu menentukan bilangannya.Sesungguhnya manusia itu sangat zalim lagi kufur. (Ibrahim: 32-34)

Memandangkan alam adalah kurniaan Tuhan yang tidak ternilai ini, manusia seharusnya bijak dan berhemah dalam mengguna dan mengurustadbir alam ini sebagai manifestasi kesyukuran yang suci kepadaNya Yang Maha Agung.

3. Perintah Penjagaan Dan Pembangunan Alam.

Alam yang unik dan tersergam indah ini sudah tentulah tidak dijadikan sia-sia sebegitu sahaja. Allah Yang Maha Berkuasa Mencipta sesuatu sudah tentulah Maha Berkuasa Mentadbirnya. Namun atas sifat RahmanNya Allah hendak meluaskan lagi kesan sifat mulia tersebut ke atas hambanya di kalangan manusia. Lantaran dikurniakan kepada manusia ini amanah untuk menjaga dan membangunkan alamNya ini. Firman Allah swt;

هو أنشأكم من الأرض واستعمركم فيها... الآية. (هود: ١٦)

Maksudnya;

Dia telah mencipta kamu dari bumi dan Dialah yang meminta kamu membangunkannya. (Hud: 16)

Abdul Qadir `Audah(1981) menyatakan;

“Tidak mengapa jika kita katakan bahawa manusia di bumi berada pada kedudukan sebagai pembangun alam sekitar yang diberi qudrat untuk melakukannya. Bumi dengan segala isinya adalah tersedia untuk mereka malah dipermudahkan lagi dengan izin Allah. Hak-hak dan kewajiban mereka ditentukan Allah yang menuntut dilakukan pembangunan ke atas alam ini. Malah Allah menganugerahkan kepada mereka qudrat untuk menguasainya. Sungguhpun begitu kita suka menggambarkannya sifat mereka sebagai yang diminta untuk membangunkan alam ini kerana Allah berkali-kali menggambarkan mereka demikian.”

Pangkat khalifah (pengganti) telah ditafsirkan dengan dua maksud iaitu; i) Pengganti kepada makhluk terdahulu sebelum mereka di bumi ini. ii) Yang berperanan sebagai pengawal dan pembangun diri, masyarakat dan alam sekitar mengikut acuan Allah.

Selain dari ayat-ayat Al Quran, kita dapati Rasulullah saw. dan khalifah-khalifah yang terdahulu sering mengingatkan orang ramai dan para tentera agar tidak memusnahkan alam sekitar atau membuat tindakan yang boleh membawa kepadanya. Ini dapat kita lihat dalam khutbah Hajjatul Wida` dan ucapan para pemimpin ketika mengutus tentera ke medan perang.

Di Malaysia telah terdapat Akta Kualiti Alam Sekitar 1974 yang menuntut penjagaan alam sekitar dengan baik. Manakala diperingkat antarabangsa pula telah ditubuhkan Kesatuan Antarabangsa Untuk Pemuliharaan Alam Sekitar, iaitu IUCN (International Union For Conservation Of Nature) yang berpusat di Gland, Switzerland.

Biarpun wujud perintah Syari`ah dan undang-undang yang kemas namun sekiranya manusia tidak mematuhi atau secara sesuka hati mengeksploitasi alam ini akan banyaklah kerosakan berlaku yang akan mengundang petaka kepada manusia itu sendiri. Firman Allah;

ظهر الفساد في البر والبحر بما كسبت أيدي الناس ليذيقهم بأس بعض الذي عملوا لعلهم يرجعون.
(الروم: ٤١)

Maksudnya;

Telah nyata kerosakan di darat dan di laut berpunca dari apa yang telah diusahakan oleh manusia supaya ia menimpa mereka dengan sebahagian dari apa yang mereka kerjakan, mudah-mudahan mereka kembali kepada Allah. (Ar Rum: 41)

Oleh itu selagi bumi dipijak, selagi langit dijunjung dan roh masih dikandung badan, maka selagi itulah manusia bertanggungjawab terhadap alam ini. Malahan ianya tidak berakhir di dunia ini. Bahkan hisab Allah pula yang menyusuli di akhirat.

4. Falsafah Pertanian Mengikut Islam.

Puluhan ayat Al Quran dan Hadith telah menyentuh tentang pertanian. Antaranya firman Allah;

والله الذي أرسل الرياح فتثير سحابا فسقناه إلى بلد ميت فأحيينا به الأرض بعد موتها كذلك النشور. (فاطر: ٩)

Maksudnya;

Dan Allah Dialah yang mengirimkan angin, lalu angin itu menggerakkan awan, maka Kami halau awan itu ke suatu negeri yang mati, lalu kami hidupkan bumi sesudah matinya dengan (hujan yang turun dari awan itu). Demikianlah (mudahnya) kebangkitan. (kembali:kiamat). (Fathir: 9)

Nabi saw.pula bersabda;

الدنيا حلوة خضرة

Maksudnya;

Dunia ini (suatu yang bersifat) manis lagi hijau (menyejukkan mata lagi menarik).

Ini seolah-olah seluruh permukaan bumi ini perlu dihijaukan.

Pertanian merupakan amalan penting dan sangat-sangat digalakkan oleh Islam. Oleh itu amalan ini akan sentiasa diberi pahala kepada pengusahanya sekalipun ia telah kembali ke rahmatullah. Sabda Rasulullah saw;

لا يغرس مسلم غرسا ولا يزرع زرعاً فيأكل منه إنسان ولا دابة ولا شيء إلا كانت له صدقة.
(رواه مسلم)

Maksudnya;

Tiada seorang Islam menanam suatu pokok , dan tiada pula ia menanamkan sesuatu tanaman (seperti padi) lalu dimakan oleh seseorang manusia, diragut oleh seseekor binatang dan oleh sesuatu yang lain melainkan ia adalah menjadi sedekah(pahala) kepadanya.(Riwayat Muslim)

Dr Isa Abduh(1998) menulis;

“Pertanian ialah suatu kerja yang disyariatkan dan suatu usaha yang bagus lagi halal. Bertanam dan berkebun menghasilkan makanan mental dan fizikal kerana ia akan menjadikan makanan yang dimakan, dan berlanjutan dalam urusan zakat dan sedekah. Bertanam itu adalah satu usaha yang selari dengan tabiat manusia sendiri, yang berguna kepada ekonomi dan masyarakat di mana dari segi ekonomi ia mengeluarkan bahan keperluan yang belum wujud (mentah) seperti biji-bijian dan juga sayur-sayuran berupa bahan makanan juga berupa pakaian seperti pokok kapas dan jerami (padi) dan sebagainya. Adapun dari segi kemasyarakatan maka pertanian berguna untuk manusia seluruhnya, sehingga haiwan (juga jin) dan burung-burung.”

Untuk menggambarkan betapa pentingnya pertanian kepada manusia Rasulullah pernah bersabda;

إن قامت الساعة وفي يد أحدكم فسيلة فليغرسها. (رواه البزار)

Maksudnya:

Seandainya berlaku kiamat, sedangkan di tangan seseorang kamu ada sesuatu benih tamar, maka tanamlah. (Riwayat Al Bazzar)

Oleh kerana pertanian adalah sebahagian dari jenis amalan mukallaf, apatah lagi bagi menjadikannya sebagai *ibadah* untuk dipersembahkan kepada Pemilik alam Yang Maha Pencipta maka ia tertakluk kepada acuan akidah, fiqh dan ihsan.

Dari segi akidah pertanian yang suci hendaklah berasaskan tauhid dan *ubudiyah* dengan penuh ikhlas serta diusahakan dengan bersungguh-sungguh dan penuh bertanggungjawab dalam mencari keredaanNya. Unsur-unsur syirik seperti pemujaan makhluk halus, kurang berdoa dan kurang pergantungan kepada Allah hendaklah dijauhkan. Manusia boleh berikhtiar sebanyak mungkin namun yang memberi ialah Allah.

Dari sudut fiqh pula semua tindakan mestilah dalam kerangka *syari'ah ilahiyyah*. Matlamat utamanya adalah menuju kearah penjagaan agama, nyawa, akal, keturunan dan harta. Setiap aktiviti juga mesti dikenalpasti samada ia berada pada tahap *dharuriyyat*, *hajiyyat* atau *tahsiniiyyat* dan mengikut karakter umumnya yang terdiri dari : rabhaniyyah, insaniyyah, menyeluruh, kesederhanaan, keseimbangan, adil, positif, jelas, tetap, dan menghimpunkan di antara pleksibel dan tetap. Kesemua itu pula tidak terlepas dari hukum taklifi dan wad'iinya.

Dalam kontek ihsan pula zikr, syukur, ikhlas, itqan, dan kebaktian sangat ditekankan dalam semua keadaan.

Jalanan ketiga-tiga ini pula hendaklah berasaskan kepada hubungan di antara Allah, alam dan sesama manusia.

Kesemua ini pula tidak akan terlepas dari penilaian halus oleh Allah dan perintah muhasabah sesama insan yang disusuli dengan balasan *dunyawi* dan *ukhrawi*. Sesiapa yang rakus atau dayus akan hilang keberkatan, dan akan menerima petaka sejak dari dunia lagi. Sebaliknya sesiapa yang mendapat keberkatan insya Allah, hidupnya diredhai. Negerinya pula akan menjadi aman dan makmur.

بلدة طيبة ورب غفور. (سبا: ١٥)

Maksudnya;

Negara yang baik akan mendapat keredaan Tuhan Yang Maha Pengampun.

(Saba: 15)

5. Hukum dan Dalil Melaksanakan Pertanian.

Sejak awal sejarah manusia lagi, bercucuk tanam adalah fardhu kifayah ke atas setiap keluarga atau masyarakat maupun negara. Ini kerana dari pertanian manusia memperoleh keperluan untuk menampung kehidupan mereka. Ini dapat difahami dari ayat-ayat Al Quran yang memerintah mereka membangunkan, alam di mana *khitab al jam`* telah digunakan di dalamnya. Antaranya firman Allah;

هو أنشأكم من الأرض واستعمركم فيها. (هود: ١٦)

Maksudnya:

Dialah yang mencipta kamu dari tanah dan meminta kamu membangunkannya.
(Hud: 16)

Pembangunan di sini termasuklah pertanian itu sendiri. Malah pertanian adalah contoh terbaik bagi tuntutan fardhu kifayah kerana manfaat pertanian adalah jelas sekali untuk orang ramai. Sekiranya tiada pertanian yang mencukupi ia akan menjejaskan keperluan mereka semua dengan segera. Oleh itu ia tidak boleh dilakukan secara sembarangan sahaja sekalipun sebahagian pertanian bertujuan memenuhi keperluan *tahsiniyyat* semata-mata.

Lazimnya sesuatu yang menjadi fardhu kifayah jika langsung belum wujud atau memadai akan membuat semua orang berdosa. Malahan fardhu kifayah adakalanya bertukar menjadi fardhu `ain. Ini jika keadaan masih memerlukan perlaksanaannya, walaupun ia telah dilakukan oleh orang lain sebelumnya. Kaedah fiqh di bawah ini terpakai sama sekali;

مالا يتم الواجب إلا به فهو واجب.

Maksudnya;

Tidak sempurna wajib melainkan ia (sesuatu) turut menjadi wajib.

Dari segi moral juga, nisbah di antara pelaksana dan bukan pelaksana pertanian hendaklah munasabah mengikut bilangan penduduk di sesuatu negara ataupun rantau dunia ini. Pertanian juga merupakan aktiviti sepanjang hayat yang perlu di teruskan dari satu generasi ke satu generasi yang berikutnya. Sebab itulah kita melihat Allah menyediakan ganjaran yang besar bagi mereka yang mengusahakannya terutamanya yang beragama Islam.

6. Asas-asas Pertanian Menurut Al Quran.

Rukun atau asas pertanian terdiri dari lima perkara berikut;

1. Tanah: iaitu tempat bertanam yang sesuai dan subur. Firman Allah;

والبلد الطيب يخرج نباته بإذنه والذي خبث لا يخرج إلا نكدا، كذلك نصر ف الأيات لقوم يشكرون. (الأعراف: ٥٨)

Maksudnya;

Adapun tanah yang baik, tanamannya tumbuh dengan subur dengan izin Tuhannya. Sedangkan tanah yang kering tiadalah ia tumbuh melainkan dengan merana. Demikianlah kami mengulangi tanda (kekuasaan) bagi orang-orang yang bersyukur. (Al A`raaf: 85)

2. Petani: Pengusaha hendaklah ikhlas dan bertaqwa. Ini digambarkan di dalam firman Allah berikut;

يا أيها الرسل كلوا من الطيبات واعملوا صالحا إني بما تعملون عليم. (المؤمنون: ٥١)

Maksudnya ;

Wahai para rasul! Makanlah daripada makanan yang baik-baik dan berbuat baiklah dengan melakukan amalan soleh, Sesungguhnya Aku Maha Mengetahui apa yang kamu lakukan. (Al Mukminun: 51)

3. Air: Ia dibekalkan berterusan sebagai nafas kepada pertanian. Firman Allah;

وَأَنْزَلْنَا مِنَ الْمُعْصِرَاتِ مَاءً ثَجَاجًا لِنُخْرِجَ بِهِ حَبًّا وَنَبَاتًا وَجَنَّاتٍ أَلْفَافًا. (النبا: ١٤-١٦)

Maksudnya;

Dan kami turunkan dari awan air yang mencurah agar Kami tumbuhkan dengannya biji-bijian dan tumbuh-tumbuhan serta kebun-kebun yang subur.

(An Naba` : 14-16)

4. Usaha: iaitu perancangan, pelaksanaan dan penjagaan sehingga mendapat hasil. Ia dikerjakan dengan rajin dan cekap. Firman Allah;

لَهَا مَا كَسَبَتْ وَعَلَيْهَا مَا اكْتَسَبَت (البقرة: ٢٨٦)

Maksudnya;

Baginya apa yang ia usahakan (dengan baik). Dan ke atasnya pula apa yang kamu kerjakan (dengan tidak baik). (Al Baqarah: 286)

5. Baja: Ia perlu bagi mencapai matlamat. Kita lihat Allah sendiri membajai buminya secara tabi`e. Firman Allah;

كَمَثَلِ جَنَّةٍ بِرَبْوَةٍ أَصَابَهَا وَابِلٌ فَآتَتْ أُكْثَاهَا ضَعْفَيْنِ. (البقرة: ٢٦٥)

Maksudnya;

Seperti sebuah kebun di tanah tinggi yang subur yang disirami hujan lebat, maka kebun itu menerbitkan buahnya dua kali ganda. (Al Baqarah:265)

Para fuqaha mempunyai perbincangan yang panjang tentang baja dan pembajakan pokok di dalam kitab-kitab mereka.

7. Faedah Pertanian Untuk Manusia.

Sememangnya pokok atau tumbuh-tumbuhan sangat berguna kepada alam dan manusia. Lazimnya faedah dari tanaman dan tumbuh-tumbuhan kepada manusia adalah seperti berikut;

- i) Makanan manusia yang berkhasiat.
- ii) Makanan untuk haiwan ternakan.
- iii) Bangunan tempat tinggal, jambatan dan lain-lain.
- iv) Pakaian.
- v) Kenderaan.
- vi) Ubat-ubatan.
- vii) Alat-alat tulis.
- viii) Alat-alat pertahanan.
- ix) Alat-alat di dalam rumah seperti perabut dan lain-lain.
- x) Alat-alat perkakasan seperti lesung, pengisar, hulu parang, pembajak dan seumpamanya.
- xi) Perhiasan.
- xii) Tempat berteduh.
- xiii) Bahan pembakar.
- xiv) Wangi-wangian.
- xv) Penyedut karbon dioksida.
- xvi) Penenang pandangan dan penguat penglihatan.

- xvii) Mengundang rahmat dan keberkatan langsung dari Allah kerana tumbuh-tumbuhan dan haiwan (selain dari manusia) yang hidup di celah-celahnya sentiasa bertasbih kepada Allah. Pertanian pula adalah melaksanakan perintah Tuhan.

8. Asas Tanah Pertanian Mengikut Rasulullah saw.

Rasulullah s.a.w bersabda:

طلب الحلال واجب على كل مسلم. (رواه الطبراني.)

Maksudnya;

Mencari yang halal itu wajib ke atas setiap muslim.(Riwayat At Tabrani)

Tariq berkata saya mendengar Said bin Al Musyyib berkata:

لا يصلح الزرع غير ثلاث: أرض يملك رقبته أو منحة أو أرض بيضاء يستأجرها بذهب أو فضة.

Maksudnya;

Tidak sesuai tanaman kecuali pada tiga tempat;

- i) Di tanah miliknya sendiri.
- ii) Di tanah di mana pengurusnya telah menyerahkan kepada seseorang.
- iii) Di tanah yang di sewa dengan emas atau perak.

Diceritakan bahawa seorang ibu berwasiat sebelum matinya bahawa dia ada meninggalkan sebuah guri emas di dalam sebidang tanah agar anak-anaknya mencarinya. Selepas ibu itu meninggal, maka anak-anaknya yang miskin terpaksa mencangkul di sana-sini dalam tanah pusaka ibu yang luasnya tidak seberapa. Emas tidak dijumpai, tetapi tanah telah diusahakan sehingga memperoleh pendapatan yang halal. Barangkali itulah yang dimaksudkan ibu “emas.”

9) Amanah Tanah.

Tanah adalah suatu pemberian Allah yang perlu dijaga menurut kehendakNya sebagai suatu amanah yang akan ditanyakan nanti tentang segala pengurusannya: dengan cara halal atau haram? Mujahid berkata Rafi`bin Khadij r.a menceritakan” Rasulullah s.a.w. telah datang kepada kami:

فنهانا عن أمر كان لنا نافعاً، فقال: من كان له أرض فليزرعها أو يمنحها أو يذرها. (رواه النسائي.)

Maka beliau melarang kami dari melakukan sesuatu (yang kami pandang) bermanfaat kepada kami; beliau bersabda ”Sesiapa yang memiliki tanah maka hendaklah dia menanaminya, atau ia diserahkan kepada saudaranya agar dia menanaminya.(di amanahkan kepadanya), atau dia biarkan sahaja tanah itu (tanpa diusahakan bila menentangi hukum Allah).”(Riwayat An Nasai)

Jabir bin Abdillah ra. Menyatakan bahawa mereka para sahabat bertanam dengan cara pawah sepertiga, seperempat dan separuh hasil (pendapatan pertanian). Maka Nabi saw. Bersabda;

من كانت له أرض فليزرعها أو يمنحها فإن لم يفعل فليمسك أرضه. (رواه النسائي.)

Maksudnya;

Sesiapa yang mempunyai tanah, maka hendaklah dia menanaminya atau dia mengupah saudaranya. Jika dia tidak ingin mengerjakannya, maka ditahan sahaja tanah itu. (Riwayat An Nasai)

Dr Isa Abduh(1998) menyatakan bahawa Islam mengharamkan pembiaran(berhenti menanam) lebih dari tiga tahun, di mana seseorang berpangku tangan tidak mengusahakan tanah terbiar tanpa membaikkannya. Maka apabila seseorang tidak mengusahakan tanahnya selama tiga tahun, maka berhaklah penguasa merampasnya demi memelihara kepentingan ummah.”

10) Galakan Bercucuk Tanam

Dalam kitab suci Al Quran, Allah swt pernah menanyakan hambanya dengan suatu pertanyaan:

أَيُّدُ أَحَدِكُمْ أَنْ لَهُ جَنَّةٌ مِنْ نَخِيلٍ وَأَعْنَابٍ. (البقرة: ٢٦٦)

Maksudnya:

Tidakkah seseorang kamu suka memiliki sebuah kebun kurma dan anggur.(Al Baqarah: 266)

Anas bin Malik ra. menyatakan bahawa Rasulullah saw pernah bersabda;

إن قامت الساعة وبيد أحدكم فسيلة، فاستطاع ألا تقوم حتى يغرسها فليغرسها فله بذلك أجر.

Maksudnya:

Seandainya berlaku kiamat, sedang di tangan seseorang kamu terdapat sesuatu benih tamar, maka dia berdaya untuk bangun sehingga dapat menanamnya (lagi), maka hendaklah ia menanamnya, maka dia masih memperoleh ganjarannya dengan kesempatan itu.”(Riwayat Bukhari).

Sabda Rasulullah saw.;

من أعمار أرضا ليست لأحد فهو أحق. (رواه البخاري وأبو داود والترمذي)

Maksudnya;

Sesiapa yang mengusahakan sesuatu tanah yang belum dimiliki sesiapa, maka dialah yang lebih berhak ke atasnya.(Riwayat Bukhari, Abu Daud dan Tarmizi).

Sabda Rasulullah saw;

لا يغرس مسلم غرسا ولا يزرع زرعاً فيأكل منه إنسان ولا دابة ولا شيء إلا كانت له صدقة. (رواه مسلم)

Maksudnya;

Tiada seorang Islam menanam suatu pokok, dan tiada pula ia menanamkan sesuatu tanaman (seperti padi) lalu dimakan oleh seseorang manusia, diragut oleh seseekor binatang dan oleh sesuatu yang lain melainkan ia adalah menjadi sedekah(pahala) kepadanya.(Riwayat Muslim)

Patutlah orang-orang dahulu sangat suka bercucuk tanam sekalipun usia mereka sudah lanjut dan adat kata mereka sendiri tidak sempat memakan hasilnya.

11. Ilmu-ilmu Yang Diperlukan Dalam Pelaksanaan Pertanian.

Sebagai seorang penganut Islam, setiap individu wajib memiliki ilmu-ilmu asas Islam yang dikehendaki Syariat, iaitu ilmu Aqidah, Ilmu Fiqh dan Tasawwuf secukupnya supaya ia boleh memandu petani dalam hubungan dengan Allah dan juga sesama mereka serta dengan alam sekitar.

Bagi seseorang Islam yang cuma hendak menanam beberapa pokok yang biasa dikenali di tanam orang lain, maka dia tidaklah sangat perlu mempelajari atau mendalami ilmu Pertanian terutama yang mengenainya. Sudah cukup dengan pengalaman pekebun yang lain sebagai panduan secara kasar.

Akan tetapi bila seseorang petani ingin menceburkan diri dalam perusahaan Pertanian, maka baharu wajar dia memiliki beberapa ilmu khusus seperti berikut;

1. Ilmu Pertanian(Agronomi)
2. Ilmu Tanah Umum(Pedalogi)
3. Ilmu Iklim(Klimatologi)
4. Ilmu Pengurusan Tanah.
5. Ilmu Kejuruteraan Pertanian.
6. Ilmu Pengairan(Irigasi)
7. Ilmu Perlindungan Tanaman
8. Ilmu Pengurusan Tanaman
9. Ilmu Penyakit Tumbuhan(Patalogi)
10. Ilmu Tentang Kuman-kuman(Bacterilogi)
11. Ilmu Tentang Kulat (Mycologi)
12. Ilmu Pengurusan Ternakan.
13. Ilmu Pengurusan Pemasaran jika petani hendak memasarkan sendiri hasil pertanian secara meluas.

Pendidikan pertanian secara pengajian langsung dan tidak langsung perlu diikuti oleh pengusaha pertanian, mengikut keperluan dari semasa kesemasa. Insya Allah dengan gabungan di antara ilmu-ilmu kerohanian, feqh dan ilmu-ilmu fizikal tanaman ini, pertanian akan berhasil dengan penuh kualiti, mencukupi, diberkati dan mendatangkan kelegaan kepada semua.

12. Bab-bab Fiqh Yang Berkaitan Dengan Pertanian.

Oleh kerana pertanian adalah satu bidang kerjaya yang sangat besar dalam kehidupan manusia maka sering didapati perbincangan yang mendalam tentang masalah pertanian oleh para fuqaha di dalam kitab-kitab Fiqh melalui bab-bab berikut;

- a) Bab Zakat
- b) Bab Shuf'ah.
- c) Bab Musaqah
- d) Bab Muzara'ah dan Mukhabarah.
- e) Bab `Ariyah (pinjaman)
- f) Bab Syarikat.
- g) Bab Pelaburan
- h) Bab Rampasan
- i) Bab Kara` (Pawah)
- j) Bab Kharaj(Cukai tanah dan lain-lain.)
- k) Bab Sewaan.

13. Pertanian Sebagai Ibadah dan Ibtıla` Dari Al Khaliq.

Sabda Rasulullah saw;

من نصب شجرة فصبر على حفظها والقيام عليها حتى تثمر، كان له في كل شيء يصاب من ثمرها صدقة عند الله عزوجل. (رواه الإمام أحمد).

Maksudnya;

Sesiapa yang menanamkan sesuatu pokok maka dia bersabar(tekun) memeliharanya dan berusaha menyuburkannya sehingga pokok itu berbuah adalah untuknya pahala di sisi Allah Azzawajalla ialah satu sedekah pada tiap-tiap yang berlaku ke atas buahnya.

(Riwayat Ahmad.)

Firman Allah;

أمن خلق السموات والأرض وأنزل لكم من السماء ماء فأنبأنا به حقائق ذات بهجة ماكان لكم أن تثبتوا شجرها، أله مع الله بل أكثرهم لايعلمون. (النمل: ٦٠)

Maksudnya;

Atau siapakah yang telah menciptakan langit dan bumi dan yang menurunkan air untukmu dari langit. Lalu kami tumbuhkan dengan air itu kebun-kebun yang berpemandangan indah yang sekali-kali kamu tidak mampu menumbuhkan pohon-pohonnya? Apakah di samping Allah ada tuhan yang lain? Bahkan (sebenarnya) mereka adalah orang-orang yang menyimpang (dari kebenaran).(An Naml: 60)

Sesaorang yang beriman termasuk petani tiada terlepas daripada ujian dan cubaan daripada Allah Azzawajalla seperti firmanNya;

أحسب الناس أن يتركوا أن يقولوا آمنا وهم لا يفتنون. (العنكبوت: ٢)

Maksudnya;

Adakah manusia menyangka bahawa mereka akan dibiarkan(sambil)berkata: kami telahpun beriman(berasa cukup dengan keimanan sahaja) sedang mereka tidak diuji.(Al Ankabut: 2)

Petani atau pekebun perlu sedar bahawa tanah pertanian dan pokok-pokok yang di tanam meskipun nampak subur menghiujau pada mulanya , ia adalah terdedah kepada bermacam perubahan yang mungkin berlaku di kala siang dan malam disebabkan;

- a) Perubahan cuaca.
- b) Kedatangan musim kemarau yang ketara.
- c) Perubahan tanpa musim apa saja kejadian.
- d) Hujan lebat.
- e) Ribut taufan.
- f) Banjir besar dan ombak besar.
- g) Turunnya harga bila hasil melimpah ruah.
- h) Pengkhianatan manusia mencuri dan merampas hasil atau wang pendapatan pekebun.

Selain daripada malapetaka yang datang adalah disebabkan cubaan dari Allah, ia juga datang disebabkan mencanggahi hukum-hukum Allah dan menghina para nabi, wali dan alim-ulamaNya.Ini jelas sebagaimana yang Allah timpakan kepada kaum-kaum terdahulu seperti kaum Firaun (Al A`raaf:130), kaum Saba (As Saba`:15-16). Contoh-contoh lain juga boleh dilihat di dalam ayat-ayat seperti: (Ad Dukhan: 24—28), (Al A`raaf: 133), (Al Kahf: 40) dan (Al Ahqaf 24,25).

Selain dari beriman, faham dengan takdir, selalu mendekatkan diri kepada Allah dengan tenang, sabar dan doa, petani hendaklah meninggalkan segala amalan yang dikutuk dan dibenciNya. Semoga Allah sentiasa memelihara tanaman dan

tumbuhan serta jauhkan petani dari segala malapetaka. Malahan petanilah yang patut menjadi orang yang paling dekat dengan Allah.

14. Kesimpulan

Ternyata bahawa Islam menghendaki alam ini terpelihara dengan sistemnya sehingga ke hari kiamat. Sementara itu bumi pula dikehendaki sentiasa dalam kejayaan dan sentiasa mendatangkan manfaat kepada isi alam.

Allah memerintah manusia supaya membangunkan pertanian dengan segala sistem dan teknologinya kerana manusia itu sendiri yang memerlukannya. Pendek kata manusia dengan pertanian berpisah tiada. Allah juga memerintahkan manusia supaya mempunyai stok simpanan makanan yang mencukupi malah dibekalkan kepada semua yang memerlukan. Tambahan pula adakalanya manusia berdepan dengan susut makanan, bencana, kemusnahan alam sekitar dan pertanian sebagai ujian atau hukuman Tuhan dan juga fenomena alam.

Sesungguhnya pertanian adalah amalan yang sangat mulia kerana ia berteraskan iman, ilmu, islam dan ihsan. Ia juga merupakan salah satu jalan yang langsung boleh mendekatkan diri kepada Allah dan mengekalkan suasana alam yang sentiasa bertasbih kepada Allah. Lantaran darinya manusia diberi kesejahteraan dan keberkatan.

Namun kerakusan manusia akhir-akhir ini dalam mengejar kekayaan yang tidak seimbang dan palsu telah membuatkan mereka sanggup mengabaikan pertanian malahan ada yang sanggup merosakkan alam sekitar dengan rakusnya. Sedarkah mereka ini bahawa amalan yang mereka lakukan itu ibarat orang menebuk kapal dari lapisan bawah untuk mengambil air sebagai jalan pintas namun akhirnya semua tenggelam belaka.

Akibat pembangunan alam yang tidak bijak dan tidak seimbang di antara pertanian dengan industri lain akhirnya ia meninggalkan berbagai fenomena yang terpaksa dihadapi oleh manusia dengan harga yang terlalu mahal seperti lebih banyak karbon dioksida, kenipisan lapisan ozon, jerebu, gempa bumi, tsunami, banjir kilat, kerosakan hutan dengan segala isinya, kepanasan berlebihan dan segala macam lagi yang membawa padah kepada manusia.

Rakyat dan pemerintah mesti bertanggungjawab sepenuhnya ke atas alam malah sentiasa menjadikan pertanian sebagai agenda utama dalam segala aktiviti dan tindakan mereka. Kata perpatih “tidak lapar orang bercucuk tanam dan tidak rugi berbudi pada tanah.”

15. Rujukan

Abdullah Al Qari bin Haji Salleh(2006): *Sumbangan Islam Kepada Sektor Pertanian Negara*, Kuala Lumpur, Al Hidayah Publisher.

Abdul Qadir Audah(1981): *Al Islam Wa Audha`una Al Siyasah*, Beirut, Muassasah Al Risalah.

Abu Bakar Abdul Majid & Abu Bakar Yang (2000): *Pengurusan Bijak Alam Sekitar*, Kuala Lumpur IKIM.

- Ahmad Mustafa Al Maraghi(Sheikh)(2001): *Tafsir Al Maraghi*,Terj.Dewan Bahasa Dan Pustaka,Terengganu, Yayasan Islam Terengganu.
- Ahmad Yasin Ahmad Al Khiyari(1993): *Zikr Az Zira`ah Fi Al Q uran Al Karim Wa Al Ahadith An Nabawiyyah As Syarifah*, Jeddah, Dar Al Ilmi Li At Tiba`ah.
- Ali Ahmad Madkur(Prof.Dr)(1990): *Manhaj At Tarbiyyah Fi At Tasawwur Al Islami*, Beirut, Dar An Nahdhah Al Arabiyyah.
- Danial Zainal Abidin(Dr)(2019): *Quran Sainifik*, Batu Caves, Kuala Lumpur, PTS Multimedia Sdn.Bhd.
- Isa Abduh(Dr) & Ahmad Ismail Yahya(1998): *Al `Amal Fi Al Islam*, Al Qahirah, Dar Al Ma`arif.
- M.Quraish Shihab(Prof.Dr)(2012): *Dia Allah Di Mana-mana*, Kuala Lumpur PTS, Darul Furqan.
- Muhammad Nur bin Ismail Al Fatani(1351H): *Kifayatul Muhtadi Pada Menerangkan Sullam Al Mubtadi*, Petani, Maktabah Halabi.
- Mustafa Al Khin(Dr), Mustafa Al Bugha(Dr) & Ali As Syarbaji (2009): *Al Fiqh A Manhaji*, Kuala Lumpur, Terj. Pustaka Salam.
- Rosmizatul Azila Mat Yasmin & Abu Bakar Yang (2014): *Islam, Pemuliharaan Hidupan Liar & Anda*, Kuala Lumpur, IKIM.
-